

Rhoda Frigerio ta presenta show musical

ORANJESTAD - Cu berdadera alegría nos a tuma conocementu di un acontecimiento musical formidable cu lo tin proximamente aki na Aruba den diferente bario. Nos ta referi na "Rhoda's Musical Show" cu actuacion di artistanan local ya afama y tambe lo tin actuacion di algun talento artistico descubri pa e propio Rhoda.

E show aki ta contene actuacion di "The Golden Treasures" e beatband campeón di Aruba, Trio Huasteca, kendenan a caba di regresa for di un gira exitoso na Hulanda, Hermanas Brokke, Hermanas Britten y Hermanas Vieira talentonan artistico cu te ainda tabata scondi, Miriam Yarzagar y un damita cu un voz inigualable, Hermanas Leerdam cu un repertorio completamente varia, Mariachi Perla di Aruba haciendo nan reaparicion, Jossy Brokke jr. creador di e bunita melodia "No me dejes" ocupante di e segundo puesto den e

festival di cancion Antillano, Mimi Mata, kende lo trece su version di e bunita melodia "Plegaria de una niña".

Ademas lo tin actuacion di e ya conocido artista Ronny Brete, Hermanas Luidens kendenan pa di prome biaha lo actua den un show tan formidable, Ito Stamper y Len Johnson. Nombenan ya conoci cerca amantenan di musica di actualidad. Ademas di e artistanan aki lo tin tambe diferente baile, entre otro "Mazurka", bala bala, West Side Story y Zorba the Greek. Lo tin comediantan chistoso, manera "Figaro" e conocido barbero comico di Sevilla y e homber cu ta lubida tur cos hasta su carson.

Actuacion especial durante di e shownan aki lo tin di Eric Britten, Glenda Cruz, Gilbert Cardoze, Diana Baahr, Desmond Sing y Johnny Habibe.

E show aki lo worde presenta en combinacion cu baile. Dia o-

cho di juli cuminsando pa och'or y inei te tres'or di marduga den Commandeursbaalclub. Dia nueve di juli, cuminsando pa cuat'or di atardi te diesun'or di anochi den Eagle Club. Dia diescuater pa och'or di anochi den Teatro Seri Noka. Na Noord Social Club e show aki lo worde presenta dia 16 di juni cuminsando for di seis'or di atardi te diesdos'or di anochi.

Y dia 23 di e luna aki presentacion di "Rhoda's Musical Show" den Bonaire Club na San Nicolas cuminsando pa seis'or di atardi te diesdos'or di anochi.

E show aki ta priminti di bira algu sensacional. E show ta bao di direccion di Jo Kock. Direccion musical lo ta den man di Rhoda Frigerio y e coordinador lo ta Robby Schouten. Ta di spera cu pueblo di Aruba lo asisti na gran cantidad na e shownan aki pa asina estimula nos propio artistanan.